

Pablo Tesalónica Anoafu Kirika

Kenexō Fomani

**Pablo a afe rafeafu feta a Tesalónica
anoxō Nios Ifofaafu ato kirika
kenexō fomani**

1 ¹Ēkīa Pablo, nō mato kirika kenexō fomai, Silvano ikaino Timoteo ikaino nā tiito nō mato fomai. Nā peke rasi Tesalónica anoxō Nios Ifofaafu nō fomai, anoxomāi Epa Nios yafi nōko Ifo Jesucristo mā Ifokōi faafono. Epa Nios feta nōko Ifo Jesucristo mato noikī mato sharafanō fekaxtetama mā isharakōinō.

**Tesalónica anoafāfe Jesús Ifokōi
fakaxō ato ōimanifo**

²Mēxotaima nō matoōxō Epa Nios aicho fakī nō kifikī iskafa fafāfāini. ³“Epa Niosi, na Tesalónica anoafāfe, mia noikakī mia yonoxosharamisfo, nāskakaxō fena fenakākima nōko Ifo Jesús manasharamisfo nokoki anā oi kiki,” ikaxō. Nānori pena tii ē mato kifixōfāfāini. ⁴Efe yora mīsttichi, Niospa mato fāsi noikī mato katoni afe yorafo mā inō. ⁵Nō mato Niospa meka sharaōnoa yoimis afeskax nō afe ipaxatiromāki. Akka nōko mekapas nō mato yoimisma, askatamaroko Niospa Yōshi Sharayaxō āfe kerex sharafofaxō nō mato Jesúsnoa nā meka chanīmakōi nō mato yoimis. Akka mā mā tāpia nō mato fe isharapaoni. Nō askaino mā Jesús Ifofakōini.

⁶Akka nō Jesús Ifofai keskafakī māri Ifofani. Nāskakē Niosnoa meka shara nō mato yoiaito inimakōiyānā mā nikakōini, Niospa Yōshi Sharapamāi mato inimakōiaino fetsafāfe mato omiskōimafiaifono. ⁷Nāskakē mā isharakōixō mā ato ōimakōia nā Nios Ifofaafu Macedonia anoafu yafi Acaya anoafu. ⁸Matoōxō nōko Ifāfe meka shara nikakī taefanifo Macedonia anoafu feta Acaya anoxō. Akka anoxos nikanifoma. Nā peke fetsafu anoxori nikanifo. Nāskaxō mā tāpiafo mā Nios Ifokōifakē. Nāskakē nō anā matoōnoa ato yoitiroa, māmāi matoōnoa tāpikōiafono. ⁹Askatamaroko fetsafāfe nokoōnoa ato yoimisfo iskafakāki: “Tesalónica anoafāfe nōko Ifo Nios Ifofakōinafo, nāskaxō Pablo yafi a afe rafeafu ato sharafayanā a yoiaifo keskara ato nikakōimisfo. Nāskakaxō afara fetsa onifakaxō, ‘Na nōko niosra,’ ikaxō anā kifimisfoma, Nioskōi Ifofakakī. Nāskakaxō nā nipanaka Nioskōi yonoxomisfo. ¹⁰Akka nā Niospa Fake Jesús mā manakōi nai mēranoax anā oaitia. Akka Niospa āfe Fake ofofani. Nāato noko ifitiro a omiskōiaifo mēranoax nō omiskōinōma.”

**Pablo Tesalónica anoxō
Jesúsnoa ato yoini**

2 ¹Efe yora mīsttichi, mā mā tāpia kaxpa nō mato ōikai kanima. Jesúsnoa nō mato yoikai kani nikakī mā

Ifakōinō. ²Mā mā tāpia nō matoki kayoamano na Filiposo anoafāfe noko īchayanā noko omiskōimapaonifo. Nāskaxō noko xatemapaiyafono, Epa Niospa āfe kerex shara noko ināno, nō ratetama na meka sharaōnoa Jesúsnoa nō mato yoimis keskara tsōa noko xatematiroma. ³Akka nō mato yoiki fanīrira nō mato yoimisma, nō mato yoisharakōimis. Askatari nō mato chakafakī yoimisma, askatari nōa nō mato paramisma. ⁴Askatamaroko Epa Niospa noko katonī āfe meka shara Jesúsnoa nō mato yoinō. Akka nōkai yorafo nokoōnoa shināmapaitiroma. Askatamaroko nokoōnoa Nios fisti nō inimamapai, nā fistichi nōko shinā mēraxō nō shināi keskara tāpikōia. ⁵Mā mā tāpia nōkai matoōnoa meka shara yoimisma, māri nokoōnoa yoisharanō. Ēkai mato feparamisma, “Noko afara shara inānōfora,” ixō. Akka a ē mato yoimis keskara Epa Niospa tāpikōia, nāto ea ōifafaini. ⁶Nōkai fetsafo nokoōnoa yoisharakāfe nō ato famisma. ⁷Akka nō aōnoa yoinō noko nīchini āfe meka shara nō mato yoinō. “Akka noko afara afeskarafaxokāfe,” ixō nō mato yoikerapaoni. Akka āfa āfe fake yome kexesharamis keskafaki nō mato kexesharapaoni. ⁸Nō mato noikōikī inimakāi nō mato Niospa meka shara yoianā nōa nō inānepaikōini, mā Nios tāpisharakōinō. Nāskaxō nō mato noipaoni keskafaki, iskaratīa nō mato noikī finasharakōimis. ⁹Efe yora mīshtichi, mā mā tāpia nō mato mēraxō yonomiski omiskōikōiyanā, a nō fichipaiyai fixiki, penata yonota fakishchāiri nō yonomis. Akka nō mato afaa kaxpa fiapaimisma, Niospa meka sharaōnoa mato yoianā.

¹⁰Akka mā mā noko ōimis, Niospari tāpia nō tanaima isharakōimiskē mato fe a mā Nios Ifoafafo fe. Nāskakē

nokoōnoa tsōa afaa chaka yoitirofoma. ¹¹Askatari mā mā tāpia nō mato inimamakōimis, mā shināmitsaitori nō mato askafamis inimamamis oa āpa āfe fake inimamatiro keskafakī. ¹²Akka nō mato yoimis mā isharakōinō a Nios Ifoafafo imis keskai. Akka nāto mato katonī Jesús keskara shara mā īpaxanō.

¹³Nāskakē mēxotaima nō Epa Nios aicho fatitaifaa māmāi noko nikasharaito, nō mato Niospa meka sharaōnoa yoiaito. Nāskakē mā yoikī iskafani: “Na meka shara mā noko yoiaī yōra mekama, Niospa meka shara,” ixō mā yoini. Chanīma, Niospa mekakōi nō mato yoimis. Nāskakē mā āfe meka nikakī mā chanīmara faino mato shināmasharai Jesús keskara shara mā inō. ¹⁴Efe yora mīshtichi, māri omiskōini māto kaifāfe mato omiskōimanaifono. Nāskarīfai nā mā ikai keskai a Nios Ifoafafo Judea anoxō Cristo Jesús Ifofakanax omiskōikani āto kaifo judeofāfe ato omiskōimanaifono. ¹⁵Nā judeofāfe nōko Ifo Jesús retenifo, taefakī a ato Niospa meka sharaōnoa yoimis ato retepaonifo, nāskaxori noko omiskōimayanā noko potanifo. Nāskaxori Nios aicho fayamata yorafo chakafakī mekafamisfo. ¹⁶Askatari a judeofoma Nios fe īpaxanōfo nō ato yoisharapaiyaino, noko ato yoitima famisfo. Nāskakē afaa chakafakī finayamafikatsaxakakī mā afara chakafakī finakōimisfo. Akka iskaratīa anā tenetiromameki Niospa ato omiskōimaki finakōi.

**Pablo Tesalónica anoafō
anā ato ōipai kapaini**

¹⁷Efe yora mīshtichi, mā nō mato fe paxkanāifinixakī, nōa nō shināki mato ōiamafikī mēxotaima nō mato shinātaifai nōko ōiti mēraxō. Akka nō kaxō nō mato ōisharapaikōi. ¹⁸Akka mā

nō mato ari kapaitaiamis, nāskaifi ēroko mēxotaimakōi mato ari kapaikōimis. Nō askafiaino, akka Satanás noko katimafamis. ¹⁹Nō mato yoisim Jesús keskara shara mā inō. Nāskakē Jesucristo oaino keyokōichi tāpitirofo Jesúsmaī Ifokōi fakaxō. Nāskakē Jesús ōiaino matoōnoax nō inimakōixii, nō mato yoipaoni keskaramāi mā nikakōimiskē. ²⁰Chanīma, nokoōxō mā Jesús Ifofakōinafono nō inimakōi. Nāskakē Epa Nios nokoki inimakōi.

3 ¹⁻²Nāskakē nō anā tenetiroma meekī nō shināita nono Atenas ano nores nētexiki, nāskaxō nofe yora Timoteo nīchixiki mato ōikanō. Na Timoteori Nios yonoxomis, nāato nofeta yonomis Jesucristoōnoa meka sharaōnoa ato yoikī. Nāato mato yoikī mato inimamasharakōitiro. ³Nāskakē ē matoki Timoteo nīchini: “Omiskōikāki anā Niospa meka nikatirofomara,” ixō. Akka mā mā tāpia na nō omiskōiai keskara. ⁴Akka nō mato fe iyoxō, nō mato yoifafāiyamea, nō omiskōixiira fakī. Nō mato yoifafāiyamea keskai mā askakōia, nāskakē mā mā tāpia. ⁵Nāskakē ē anā tenetiroma meekī, ē Timoteo nīchiyamea mato yōkatanō, a mā Jesús Ifofapaoni keskafakī ai mā Jesús Ifofamākī ē tāpipaikī. Akka ē ratekōiyamea, “Nīafaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

⁶Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiaito. Noko yoia mā noko shināyanā mā noko noikōiaito, askatari mā noko ōisharapaikōiaito, nā nō mato ōipaiyai keskafakī mā noko ōisharapai. ⁷Nāskakē efe yora mīshtichi, noko Jesúsxō omiskōimayanā noko fekaxtefaifono mā

Jesús Ifo sharafakī mā noko inimamakōimis. ⁸Akka mā mā Jesús Ifofashara, mā anā afaa fetsa shināima. Mā nō tāpiax nō inimasharakōi nō isharakōitiro. Nāskakē afara afeskaraino nō tenetiro. ⁹Nō matoōnoa shināki nō Epa Nios kifīkī, nōko ōiti mēranoax nō fāsi inimakōi. Nāskakē nō matoōxō Epa Nios kifīki nō aichofa fafafāini. ¹⁰Nāskakē penata yoita fakishi yoita nō Nios kififafāini matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

¹¹Nāskakē Epa Nios feta nōko Ifo Jesucristo mato ari noko nīchipainō nō mato ōikanō. ¹²Nōko Ifāfe mato shināmasharaino mā noināi finakōinō, fetsafori mā noisharanō, nō mato noiāi keskafakī māri keyokōi yorafo noisharakōinō. ¹³Mā askaino Epa Niospa māto ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorafoya oaitia māri a keskara shara ixii, Epa Niospa ōiaino.

Afeskax isharaxō nō Nios inimamatiromē nokoki inimanō

4 ¹Efe yora mīshtichi, mē mekai xatekī ē mato yoinō. Nō mato yoipaoni afeskax mā itiomākī Nios matoki inimanō. Akka nā nō mato yoipaoni keskai mā mā askakōia. Nāskakē anā nō mato yoi noko nikakapo. Mā Nios Ifofaa keskafakī nōko Ifo Jesucristoōxō Ifofakī finakōikāfe.

²Akka mā mā tāpia nōko Ifo Jesús noko yoini keskara, nānorikōi nō mato yoisim. ³Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma, ⁴Askatamaroko āfiyatirofo āfe āfi noiyānā āfe āffes ixiki. ⁵Nāskata afara

chakafapaimiskōi iyamaxikakī, a Nios tãpiamafãfe amisfo keskara axikakima. ⁶Akka Epa Niospa yoini iskafakī: “Fẽtsa ãfi fe ipaiyamakãfe. Tsoa fomãyamakãfe fetsa ãfi fe ixiki,” ixō Niospa yoini. Akka nõ mato yoini keskai, tsoa askayamakī afara chakafaifono Epa Niospa ato omiskõimaxii. ⁷Epa Niospa noko katonima nõ afara chakafanō. Askatamaroko noko katoni a keskara shara nõ inō. ⁸Nãskakē a ē mato yoimis keskara tsōa nikayamakī atokai yora fisti nikakaspaima. Niosri nikakaspai, nãato ãfe Yōshi Shara mato inãfiano a mato amapaiyai keskara mã anō.

⁹Èfe mekakai mã fichipaima mã ranã noinãxiki. Epa Niospa mato tãpimani mã noinãnō. ¹⁰Mã nõ tãpia mã Nios Ifofaafo Macedonia anoxō mã ato noikõiaito. Nãskakē nõ mato yoisharapai, mã ato noiki finakõinō. ¹¹Nãskakē isharakãfe mãto õiti mēraxō afanã mato fekaxtefanōma. Fẽtsa afara afeskarafaino aōnoa shinãchakayamakãfe. Nã Niospa mato amapaiyai keskara fisti akãfe. Askatari mã yonotiro xanikima. Nãnori nõ mato yoimiski. ¹²Nãskafakī mã yonotiro a mã fichipaiyai fixiki. Kaxpa afaa ato yōkayamakãfe. Mã askaito a Nios Ifofaafãfema matoõnoa shinãkõitirofo.

**Nõko Ifo Jesús anã oaino,
¿afe keskara ixiiimē?**

¹³Efe yora mĩshtichi, ē mato yoiai keskara nikasharakãfe. Jesús Ifofaafo nakanax afeskakanimãkai ē mato yoinō, akka a Ifofaafoma ato fe yorafo naafono, manomitsakani omiskõikani. Akka mã askaima mãmãi Nios Ifofaax, mãmãi anã õinõnãixiakī. Akka a Nios Ifofaafoma anã õinõnãkanima. ¹⁴Mã nõ tãpia Jesús nafiax afianã otoni. Nãskarifiakī mã nõ tãpia Niospa atori otofaxii. Jesús anã oaino, a Ifofakanax namisfo.

¹⁵Nãskakē nõ mato yoimis nõko Ifo Jesús noko tãpimamis keskara. Akka nõ

nayoamax nõko Ifo Jesús oaino nõ rekē nai mēra kaima, mã naitaenifo rekē fokani. ¹⁶Akka nõko Ifo nai mēranoax fotopakekafãni fãsikõi mekakeraxii xanifo finakõimãiax. Askatari mã ãjiri xanifo finakõiafãfe ãto mekari nõ nikaxii. Askatari Niospa ãfe maneti chãi chãisaito nõ nikaxii. Nãskakē a Cristo Ifofakanax namisfo otoi taexikani. ¹⁷Nãskata a nõ namisfoma Niospa atoya noko iyoxii, nãskakē nai kõi mēranoax nõ fichinãxii. Nõko Ifori nofe ixii nai kõi mēra. Nãskakē nõko Ifo fe mēxotaima nõ ipanaka. ¹⁸Nãskakē mã ranã inima faatanãsharakãfe, na meka sharaõnoax.

5 ¹Efe yora mĩshtichi, nõko Ifo Jesucristo anã oaino anã nõ mato yoitiroma.

²Akka mã mã tãpikõia mã oaitia tsōa manasharayamaino nõko Ifo nokotiro. Nã afaa shinãima tanaima oxafono, fakishi oax yometso atoki yometsoitiro keskai. ³Yorafo iskaifono: “Nõkai afaa chakafamisma nõ isharakõia,” ikaifono Epa Niospa ato omiskõimanaino pae meexikani. Oa kēromã fake nanexō mã fake kãikī pae meetiro keskara meexikani. Nãskakē mã omiskõiai nokoaino tsoa faki onetiroma.

⁴Akka efe yora mĩshtichi, mãkai oa fakish mēra nia keskarama, askatamaroko mã oa penata nia keskara. Nãskakē mã manasharaito nõko Ifãfe mato fichitoshitiro. Akka mã Ifofaafoma oa fakish mēra nia keskarafono, atoki yora yometso oax atoki yometsoaino tsōa tãpitiroma keskarafo. Nãskarifiakī nõko Ifo oaino afaa shinãtirofoma, Ifokairoko fakaxō. ⁵Akka mãni mã penata nia keskara sharakõifokī. Mãkai oa fakish mēra nia keskarafoma. ⁶Nãskakē mã Satanãs ifofamisfo keskara nõ imisma, afãfe afarafo chakafaifo fisti shinãmisfo. A Jesús fotoaino tsōa shinãmisma. Akka nõ anã Jesús oaitia nõ shinãi, oa yora oxa keskara nõ imisma. Oa yora moia keskara nõ imis Jesús oaitia manai xafakĩakõi ishaxō.

7Nā afaa shināifoma a Satanás ifofaafō nā fakishi oxafo keskarafō. Nāskarifiāi a Satanás ifofaafō a afaa shināifoma fakishi pāemisfo keskarafō. ⁸Akka nōkai ato keskarama, nōfi oa penata nia keskara sharafoki. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanás noko afaa chakafamatiroma. Māraki sorarofāfe āto rapati kerexkōi safeafono tsōa ato retetiro, āto maiti kerexkōi safeafonori tsōa ato retetiroma. Nāskarifiakī nō Jesús Ifofaano, āfe Yōshi Shara nō mēra naneano Satanás noko afeska fatiroma. ⁹Akka Niospa shinānima a omiskōipakenakafo mēranoax nō omiskōipakexanō. Askatamaroko noko ifini Jesucristoōxō nōko chaka noko soaxoxiki nō afe ipaxanō. ¹⁰Akka Jesucristo nokoōnoax nani nō afe ipaxanō. Nayamafīax mā naaxri nō afe nīpanaka. ¹¹Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanākāfe.

Pablo A Nios Ifofaafō ato yoisharani

¹²Efe yora mīshtichi, ē mato yoisharapaikai, ea nikasharakāfe. Epa Niospa nā Ifofaafō katonī āfe meka shara mato yoinōfo. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyanā ato nikasharakāfe. ¹³Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēenāpaitama isharakōikāfe.

¹⁴Askatari efe yora mīshtichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmitsaifo ato inimamakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyanā fenāmāshta mā ato yoisharatiro.

¹⁵Nāskakē kexemesharakāfe, fetsafāfe mato noikaspaifono ato kopiyaamakāfe. Askatamaroko noinā faatanāsharakāfe, keyokōi yorafo sharafakāfe.

¹⁶Mēxotaima inimaafāikāfe. ¹⁷Pena tii Epa Nios kififafāikāfe. ¹⁸Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

¹⁹Niospa Yōshi Sharapa mato amapaiyai keskara xateyamakāfe. ²⁰Fetsafāfe Niosxō mato yoiāifono a yoiāifo keskara, “Na afamara,” ixō ato nikakaspakakīma, ato nikasharakōikāfe. ²¹Akka fētsa mato yoipaiyaito Niospa Yōshi Sharaōxō yōkakāfe nā mato yoiāi keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakima. ²²Afara chaka fishtayamakāfe.

²³Niospa mātō yorafoya, mātō fero mēshofoya mātō yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata mātō ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitīa mato shināmasharaxii. ²⁴Niospa mato katonī mā Ifofanō. A noko yoiāi keskara Niospa noko pāratiroma, noko axotiro.

Mā mekai xatekī Pablo ato yoisharani

²⁵Efe yora mīshtichi, noko Epa Nios kifixokāfe.

²⁶Keyokōi a nōko Ifo Jesús Ifofaafō fe yoinōnāsharakāfe.

²⁷Nāskaxō Epa Niospa mato yoiāi keskara nikasharakāfe. Nā mā Ifofa tii ē mato kirika kenexō fomaikai ato nikamasharakāfe.

²⁸Nōko Ifo Jesucristo mato noikī mato sharakōifanō. Nā tii ē mato yoi.

Pablo